



Arturo Oduber:

“Cactus Fantasy” di gruponan comeback lo tin trahenan colorido

ORANJESTAD(AAN): Un di e personanan involvi den e “comeback” di gruponan di antes den Carnaval 60 ta e bon conoci ciudadano Arturo Oduber, ex docente y ex politico, pero tambe un bon amante di carnaval. El a splica cu nan a bin ta trahando duro riba participacion di grupo di Savaneta, entre otro e trahenan pero tambe lo participa cu roadpiecenan.

E ta e persona cu ta duna un man den e diseñonan pero tambe pa traha roadpiecenan, cu ta uza otro material cu no ta solamente paña. E ta un trabao basta pisa, segun e ta splica, pasobra ora cu pinta algo riba papel ta un forma, pero pa trahe ta existi hopi mas trabao y fantasia. “Ta combina e materialnan cu nos tin na nos disposicion y nos ta haci hopi uzo di reciclahe, pa trata di baha e gastonan.

E ta existi hopi tempo y tur cos ta obra di man. Pero e tin su parti positivo cu ta uni e grupo,” Oduber a splica. E ta contento di mira e animo y e sentido di cooperacion cu ta haya di esnan cu ta partici-



pa cu nan den Carnaval 60. Decoracion y furamento ta loke ta tumando hopi tempo, ya cu e cactusnan tin hopi sumpiña den colornan di pla-

ta, oro, brons, etc.

Y tur e trabao aki ta worde haci manualmente. E grupo ta bay participa den e tres paradanan grandi” Lighting Parade; Parada Grandi na San Nicolas y Playa. E grupo tin diseño di tuna, cu e damanan tin un shoulderpiece cu e costuum y tuna riba cabes. Ta haci uzo di colornan briyante. E cabayeronan ta bisti riba cabes un dader di cadushi. Den e trahenan lo bay tin tur e colornan cu ta observa den mondi. E roadpiecenan, e ta bisa, lo ta un beyeza y ta representa amor pa mondi. “Nos lo ta e baluartenan di carnaval,” Oduber a bisa.